



Sesida dals

Communitgà ils

Protocol nr.

13 d'avust 2024

15 d'avust 2024

613/2024

## **Dumonda Nicolay**

concernent first responders en il chantun Grischun

### **Resposta da la Regenza**

En grondas parts dal chantun dovri in tschert temp, fin ch'ils servetschs da salvament professionals arrivan al lieu da l'eveniment. Cun il conclus dals 26 da matg 2020 (prot. nr. 471/2020) ha la Regenza incumbensà il Salvament alpin svizzer (SAS) da stabilir e da manar l'organisaziun «First responders plus en il chantun Grischun». Tras questa organisaziun vegn garantì l'emprim agid per persunas ch'èn daventadas grevamain malsaunas u che han gì in grev accident, fin che las forzas d'acziun professionali arrivan. La finamira d'amplifitgar cun 350 first responders plus (FRP), sutdividids en 70 gruppas da FRP cun mintgamai tshintg commembras e commembers e repartids sin l'entir territori chantunal, è vegnida fixada en ina cunvegna da prestaziun. Mintga gruppa da FRP vegn equipada cun in satgados d'urgenza, cun in defibrillatur extern automatisà (AED) sco er cun il material da sanidad necessari. Perquai ch'il SAS cuvra cun FRP l'entir territori chantunal en moda confurma als basegns, vegn serrada ina largia en l'organisaziun dals fatgs da salvament dal chantun.

*Tar la dumonda 1:* En il rom da la realisaziun dal punct central da svilup 10.1 dal program da la Regenza 2025 fin 2028 èsi previs d'equipar ils vehichels da polizia cun AED e da scolar las polizistas ed ils polizists en l'applicaziun dals AED.

*Tar la dumonda 2:* Las emprimas acziuns han ils FRP prestà gia a partir dal fanadur 2020. Fin la fin da la fasa da project è il dumber d'acziuns creschì fermamain: L'onn 2020 han ils FRP prestà 21 acziuns, l'onn 2021 54 acziuns, l'onn 2022 114 acziuns e l'onn 2023 240 acziuns. La fin da l'onn 2023 eran 86 gruppas cun var 450 FRP prontas a l'acziun. Bunamain 280 FRP possedevan la scolaziun certifitgada d'emprim agid IVR 2, 20 la scolaziun certifitgada IVR 3 e 150 eran persunas spezialisadas sco

tgirunzas e tgirunzs dipl., sanitarias e sanitaris da salvament e.u.v. Uschia vegn cuntanschida resp. surpassada la finamira d'amplificaziun ch'è fixada en la cunvegna da prestaziun. Il Salvament alpin grischun (SAG) publitgescha sia statistica en il rapport annual.

*Tar la dumonda 3:* En situaziuns cun privel da mort han las mesiras d'agid immediat che vegnan prendidas durant las emprimas minutas, ina influenza decisiva, sche persunas ch'èn daventadas tuttenina grevamain malsaunas (infarct dal cor, culp) u che han già in grev accident survivan. Gia en la fasa da concept ha la Regenza constatà sin basa da las relaziuns topograficas en il chantun Grischun, ch'in sistem da first responders che sa restrenscha unicamain als cas d'urgenza dal cor, na bastia betg e ch'ella stoppia extender il sistem da first responders. Perquai è ella sa decidida conscientamain, ch'ils first responders grischuns na disponian betg mo da la scolaziun per cas d'urgenza dal cor, mabain hajan er la qualificaziun d'agir svelt e segir en autras situaziuns d'urgenza, sco collaps da la circulaziun, svaniment, perditas da sang grondas e visiblas, dolurs en il pèz, fadia da trair flad e protecziun cunter chalur u cunter fradaglia. Per mussar quest vast champ d'acziun dals first responders grischuns è vegnida creada la denominaziun «first responders plus». D'introducìr in ulteriur sistem che integrescha la populaziun, dentant che conceda bler main cumpetenzas, considerescha la Regenza sco betg cunvegnet. Las abitantas ed ils abitants dal chantun ch'èn interessads, pon gia oz participar sco FRP.

*Tar la dumonda 4:* A lunga vista vegn la Regenza a garantir la disponibladad da FRP tras la cunvegna da prestaziun cun il SAS. En quest connex vegni er discutà cun il SAS d'extender ils FRP sin l'entir territori chantunal e d'augmentar il dumber dals FRP.



En num da la regenza

Il president:

Il chancelier:

Dr. Jon Domenic Parolini

e.sub. C. Hartmann Lütcher